



O Volapükafkens Valöpo!

PÖTÜ YELACEN

Ekö! Yel nulik! Pük laidüpi!

Dü yel pasetik vol ti lölik elärnon ömikosi tefü Volapük. Jenöfo Sog Bevünetik Volapüka benikon in Bevüresodaklub ed in gased obsik.

Emäniotob gasedi. Cenöf, kuliv, nited kinik! Balido e ledino, sötoobs danön ladöfiküno Guvani obsik, Ralph, dinädü vobam e skil ziliks e sufädiks. Kuratiko tü del balid mula alik pubon gased flifik, do kösömiko ai süpik. Tü tim et betikolsös, begö! eli Ralph e doatis okik jäfediks fo nünöm dü düps so luniks.

Yel nulik, slud nulik. Lüödü zeil kinik stütobs-li püki vönik lifayelas tumkildeg ün tumyel so difik? Kin binon blesir püka ko slopanas so nemödiks? Ko blig kinik kompenobs ko saged so bisarik? Sludolsös, ols it, dö atos!

Ob it fümob, das pük at binon plak patik nen leigät, bi pük, too mekavik, dalabon lani dibik oka, keli kanoy suemön e senön te medü geb. No saidos ad slüfön - zesüdos ad slugön. Binon blig obsik ad konsefön kulivi e blesiri lanäla slopanas love yels mödik pro futürans - no te yela nulik at, ab yelas valik nog okömölas.

Kodü atos, medü gased obsik, sedob Volapükanes valöpi Benovipis Ladöfikün oba pro yel 2010 äsi pro yels fütürik.

Brian R. Bishop
Cifal Soga Bevünetik Volapüka

HIPUL, KEL TÕBO PÄSAVOM DE LEJEK JEIKIK
(Fa hiel Frank Roger)

Solalit äglimon su flom me suetod petegöl zioma Harry.

„Lülogolsös podis us,” äsagom, jonölo onis. „Binons köl ot äs cügs olik, o Tommy. Rojan sanik.”

„Dalobs-li labön ömikis, o ziom Harry?” äsäkom hiel Tommy.

„Fümö! Plökolsös ömikis, o cils.”

Pods äbinons lesmekiks, mu vaetöfikis, e vemo kliniks, kuratiko äs ret topa.

El Tommy älogom floris kölas mödik, yatis, kels ärönons bevü bims, bödis, kels äflitons löpo : fomis blägik e brauniks ta pöd sila blövik klilik. E, klüliko, äbinon sol, kel äskuton liti ä vami lifükölis oka valöpo.

„Stom vamikon ai plu,” äsagom ziom Harry. „Golobsös lü lak ad svimön! Svim obinon gudik, no-li?”

Ziom Harry, els Tommy e Jim, e jiel Lisa säklotons okis vífiko ed ädaivons ini vat kristadakilik; fläki stääna blövik kamik sila pätroivon seko ini dileds mödik glimik.

Vat äbinon plitiko koldülik.

„Drinolsös!” ävokädof el Lisa, „binon benosmekik.”

Els Tommy e Jim äsökoms konsäli gudik söra ed äslugoms mödoti gretik vata koldülik. Äguton vemo klinik, ab tän

I: 3 :2010

Süpo val äbinon mo. El Tommy älöädöm in bed oka; anatemon spamo e suet koldik ätegon omi.

Kojmar äbinon mo. Dū minuts ömik poso, fidölo janedi nulüdik, äsludom ad bepenön mote drimi.

„O motül! Elabob kojmar vo jeikiki.”

„Vero-li? Bepenölös oni obe.”

„Ziom Harry, els Jim, Lisa ed ob äbinobs in vol bisarik nepesevöl. Äbinobs su länäd, nen jelodaklotem, igo nen loxinamaskars. Solalit ästralon love obs ed änünatemobs luti nen tikön dö dunöf riskädik somik.”

„Sülö! Kis ejenos-li?”

„Älogobs bödis e yatis nen kälön dö mögod näfäta. Äblinobs lomio podis, kelis ituvobs, ed äfidobs onis.”

„Ho Tommy! Vögatön mota äbinon kesenälük, legiko favik, do te ibinon drim.

„Poso äšvimobs in lak nilik ed igo ädrinobs bosu vata.”

El Tommy älemufükom kapi. No äkanom ga fovön. Mot äröbülof kapi omik.

„No kudolös, o Tommy! Val binon mo anu. Egekömol ini vol jenöfik anu.

El Tommy änutom. Kod favik vero no plu ädabinon. Äblumom ad golön lū jul, ed östeifülom ad glömön dini lölik maleditik. Älenükom klotemi härmetiko pesnilöl kobū loxinamaskar, kel öjelon omi ta lit nenmiserik lūtraviolätik, äsi ta lutem pevenenöl, kel äbinon fulū baktars ä kiems deidöls e ta nims me maläds difik penäfatöls, kels ökanons kontagön omi su julaveg. Ägolom da lutilök sui sūt, vinegöl patrulanes pevaföl niläda.

I: 4 :2010

Suno obinom sogū flens oka dōnu su pledöp distalif jula ad
komōn pō tidodem lailifama stabik e ad valemō bōfōn.

Lif no ābinon tu fefik: ādabinons nebuāds ōmik, ab pul nāmik ā
lanālik ōkanon sufōn onis.

Kojmar jeikik ya piglōmon.

⌘ ⌘ ⌘ ⌘ ⌘ ⌘ ⌘ ⌘ ⌘ ⌘

MEDIT

(fa Charles Baudelaire)

Binolōs sapik, o glum oba, o binolōs takedikum.
Eflagol soari; nexānon; ekō on:
I lutem ga trubik ninedon ya zifi,
Polōl balanes pūdi, votanes kudi.

Du lumōdot pemik menas deadōfik,
Dū lebatam juita, boyad nensenōlo,
Id oklopom okblami me zāls somik slafik,
O glum obik! duggedolōs obi isio,

Fagik de ons. Loegolōd yelis deadik blegikōlo,
Su bakuns sila klotis vōnādavogādik lenlabōlo;
Svelōn se dibot vatas levirōl Lepidi smililōlo;

Ās funaklot lunik, jū Lofūd anu tiron oki
Sol deadōl, kel slipikon dis bobād;
Dalilolōs, o lōfāb, neita svidik maleki.

⌞ ⌞ ⌞ ⌞ ⌞ ⌞ ⌞ ⌞ ⌞ ⌞ ⌞ ⌞

RÄTIL DEKULA

Ekanols-li tuvōn kobotis deglul nūmas : bal, tel, kil? Ekō ons:

1, 2, 3, 12, 13, 21, 23, 31, 32, 123, 132, 213, 231, 312, 321

FEY GUDIK

(Fa hiel L. L. Zamenhof)

Jiviudan semik älabof dautis tel. Daut bäldikum so äsümoŭ ko mot ma kalad e logod ofik, das alan, kel älogon ofi, äkanon tikön, das logon moti; bofikans äbinofs so neplitiks ä so pleidiks, das no äkanoy lifön ko ofs.

Daut yunikum, kel äbinof pöträt lölöfik, patöfik gudäla ä snata, äbinof zu balan jipulas jönikün, kelis äkanoy tuvön.

Ibä alan löfon kösömo pösodi, kel sümon ko on, mot at älöfof levemo dauti bäldikum oka, e leigüpo älabof heti dredabik ta daut yunikum. Ämutof ofi ad fidön in kvisinöp e ad vobön nenropo. Bevü dins votik, cil neläbik at ämutof, telna a del, golön ad kupön vati tö top vemo fagik e lüpolön lomio lufladi fulik ä gretik.

Ün del semik, ven äbinof näi fon et, äkömoŭ lü of vom pöfik, kel äbegof ofe drini.

„Vemo vilöfo, o gudälan obik,” äsagof jipul jönik. E sunädo älavof lufladi okik ed äkupof vati tö plad klinikün fona. Tän älüpolof oni lü vom, kipölo ai lufladi, dat vom äkanof drinön koveniälükumo. Ven vom pöfik itakedükof soafi okik, äsagof jipule: „Binol so jönik, so gudik ä so snatik, das mutob givön ole legivoti.” (Jenöfo vom at äbinof jifey, kel isumof fomi voma pöfik vilaga ad logön viogretik öbinon plüt jipula yunik.) „Ko vöd alik, keli osagol, osekömon se mud olik ü flor, ü ston völadik.”

Ven jipul ikömoŭ lomio, mot ofik änofof ofi, bi igekömoŭ so latiko de fon.

„Pardolös obi, o mot,” äsagof, „das äbilibob so lunüpo lä fon.” E sosus äspikof vödis at, se mud ofik äsebungons rosads kil, pärlats kil e diamoins kil.

„Kisi logob-li?” ävokädoŭ mot ofik ko stun legretik. „Jinos obe,

das se mud olik esebunons pärlats e diamoins! Kiöpao kõmons-li, o daut obik?" (Atos äbinon naed balid, das inemof ofi : daut obik).

Cil neläbik äkonof mote balugäliko valikosi, kel ijenos ofe, e, du äspikof, äsefalon de mud oka lemöd diamoinas.

„If binos somo,“ äsagof mot, „mutob sedön usio dauti votik oba. O Mariül, lülogolöd utosi, kel sekömon se mud söra olik ven spikof: no binosöv-li gudik ad labön fägi somik? Te mutol golön lü fon ad kupön vati, e ven vom pöfik obegof ole drini, ogivof oni ofe plütiko.“

„Binosöv vemo gudik,“ ägespikof daut neplütiko.

„Vilob,“ äsagof mot, „das golol usio – gololöd sunädo!“

Daut ägolof, abi mürölo ai.

Äsumof vasodi largentik jönikün, kel äbinon in lödöp.

Töbo ikömofo lü fon, ed ekö läd, liegiküno peklotöl, kel ämogolof de fon, ed äbegof ofe drini. (Atos äbinof jifey ot, kel isumof sui ok fomi e klotis jiplina, ad logön viogretik öbinon bad jipula at).

„Ekömob-li isio,“ äsagof ofe jipul neplütik e pleidik, „ad givön ole drini? Epolob-li vasodi largentik at ad givön drini läde liegik? Ced obik binon: sumolöd vati ol it, if vilol drinön.“

Leno binol plütik,“ äsagof jifey nen zun. „Gudö! Bi binol so dünöfik, dunob ole legivoti: Ko vöd alik, keli ospikol, osebunon se mud olik ü snek, ü frog.“

Sosus mot iloegof kömön dauti, äluvokädofof ofe: „Eplöpol-li, o daut obik?“

I: 7 :2010

„Si! o mot,” ägespikof neplütikan, sejedölo sneki bal e frogi bal.

„Sülö!” ävokädofof mot, „Kisi logob-li? Sör olik binof blamabik in tef at. Opönob ofi demü atos!”

E sunädo ärönof ad flapön ofi. Cil neläbik ämorönof ed äklänedof oki in fot fagikün.

Son rega, kel äkômom de yag, äkolkômom ofi; bi äbinof so jönik, äsäkom ofi: „Kisi dunol-li is löliko soalik, e kikodo drenol-li?”

„Levi, o sö! Mot obik äsemofof obi se dom.”

Son rega, kel älogom pärlatis e diamoinis, kels isekömons se mud ofik, äsagom ofe: „Kiöbao kömons-li dins at?”

Äkonof ome löliki ventüri oka. Regül ävätälom, das fäg somik labon völadi gretikum, ka gamagivot; seko ädugom ofi ledomio fata, (sevabo: reg), kiöp ämatikom ko of.

Ab dö sör ofik kanobs te sagön, das ävedof so nelöföfik, das mot lönik ofa äsemufof ofi se dom, e jipul neläbik, erönölo mödo ed etuvölo neki, kel vilonöv getedön ofi, suno ädeadof in gul fagikün fota.

(Tradutod fa hiel Igor Wasilewski)



Sufäd binon vaf, kel ti ai vikodon.

1:8:2010

DIV REGA SALOMON (FIN)

EKÖ FIN KONOTA:

JIMAGIVAN GAGUL BÄTOF ELI
QUATERMAIN E KOMPENANIS OKA
INI KEV, E KODOF, DAS KÖLÜMS
KEVA DÄSTURONS. OF IT DEADOF
SEKÜ DUNOT AT.

KO FIKUL GRETIKÜN MANS
PLÖPOMS AD SEKÖMÖN SE KEV.

POSO YULOMS AD LESEILÖN DÖ
DIV, E SO GEVEGOMS LOMÄNIO.

Magods fa hiel Ernö Zorad

Tradutod Volapükik fa hiel R. Midgley.

CEDODS HIELA „SAADI”

Sapan nen tug binom äs bleinan, kel polon flamoti. Litükom votanes vegi,
ab golom, om it, in dag.

Gudikos te davedon dub sufäd; spidiälan vobädon nosi.

Utan, kel konleton noli, e no sevon ad gebädön oni, binon äs man, kel
plaudom länedi, ab no besovom oni.